



Broj: 01,02,03,03/11-05-1-2681/17

Sarajevo, 26. 2. 2018.

Izvještaj

o učešću delegacije Parlamentarne skupštine BiH na Radionici WTO-a o trgovinskoj politici za članove parlamenata zemalja centralne i istočne Evrope, centralne Azije i Kavkaza (CEECAC)

Joint Vienna Institute, 13.-15.2.2018.

Delegacija Parlamentarne skupštine BiH u kojoj su bili: Šemsudin Mehmedović, predsjedavajući Komisije za vanjsku i trgovinsku politiku Predstavničkog doma, Nenad Lalić i Nikola Lovrinović, zamjenici, na poziv Svjetske trgovinske organizacije (WTO), a uz podršku Uzajamnog fonda Razvojnog plana iz Dohe i Joint Vienna Instituta, učestvovala je u radu Radionice o trgovinskoj politici za članove parlamenata. Cilj Radionice je, prije svega, bio da se parlamentarima omogući sticanje boljeg uvida u pravila Svjetske trgovinske organizacije i način njihovog funkcioniranja, te da se upoznaju s rezultatima ministarske konferencije WTO-a održane u decembru 2017. godine u Buenos Airesu.

Thomas Richardson, direktor JVI, Said Al Hashimi, Samer Seif el Yazal i Yesica Harmosa, zvaničnici WTO-a, uglavnom su fokusirali uvodna izlaganja i prezentaciju na osnovne karakteristike ove organizacije i potrebu da se parlamentarci što više obraćaju jedni drugima. Posebno su ukazali na značaj i ulogu transparentnosti, analitičkog pristupa, nediskriminacije i otvaranja novih radnih mjesta. Svoja obraćanja parlamentarima potkrijepili su pominjanjem svih značajnijih dokumenta za WTO donesenih i usvojenih od Dohe do Buenos Airesa.

Članovi delegacije PSBiH učestvovali su u diskusiji o izazovima i mogućnostima trgovinske razmjene u državama CEECAC-a. Tokom rasprave naglašena je potreba jačanja uloge parlamentaraca u radu WTO-a i njihovog aktivnog uključivanja u rješavanje međunarodnih trgovinskih pitanja i problema. Posebno je naglašena uloga državnih parlamenata u procesu ratifikacije trgovinskih sporazuma.

Učesnici ove radionice posebno su se osvrnuli i vrlo konstruktivno diskutirali o pristupanju i članstvu onih zemalja koje to još uvijek nisu u Svjetskoj trgovinskoj organizaciji. Pozdravili su skori ulazak Bosne i Hercegovine u završnicu pregovora o članstvu u WTO-u te izrazili duboko uvjerenje da će pregovori biti uspješno okončani do kraja 2018. godine i da će Bosna i Hercegovina postati punopravna članica ove organizacije.

U ime delegacije Parlamentarne skupštine BiH kolegama parlamentarima na ovoj radionici obratio se Šemsudin Mehmedović, predsjedavajući Komisije za vanjsku i trgovinsku politiku PDPSBiH. Zahvalio se svima onima koji su podržali napore BiH u realizaciji puta ka punopravnom članstvu u WTO-u i prenio poruku bh. parlamentaraca da je i ovo veliki uspjeh BiH na njenom putu ka integraciji u EU. Istakao je da je BiH mukotrпно radila na ispunjavanju uslova za članstvo u WTO-u, da od 2003. godine vodi aktivnosti na pregovaranju i usaglašavanju sa svim zemljama te pomenuo da smo u fazi završnih pregovora s Ukrajinom, Rusijom i Brazilom, te da su pregovori trajali i tokom Konferencije u Buenos Airesu.

Mehmedović je izrazio nadu da će preostali pregovarački procesi BiH biti okončani do kraja maja, a BiH biti primljena u WTO do kraja 2018. godine. Naglasio je da je BiH imala dug proces prilagođavanja i otvaranja tržišta i to je njena prednost u dostupnosti svjetskom tržištu.

Delegacija PSBiH je još jednom, u ime Parlamentarne skupštine BiH, zahvalila na pozivima bh. parlamentarcima da prisustvuju skupovima koji jačaju međuparlamentarnu saradnju kao i svaku drugu koja doprinosi unapređenju odnosa između država.

Zapisnik sačinila
Mirsada Bukarić-Kovačević

Zapisnik odobrio:
Šemsudin Mehmedović

Dostaviti:

- Kolegiju Predstavničkog doma PSBiH
- Kolegiju Doma naroda PSBiH
- Kolegiju Sekretarijata PSBiH
- Ministarstvu vanjskih poslova BiH
- Sektoru za međunarodne odnose i protokol
- a/a